

Monday, August 18, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

MOBILE RECOVERED

Bawngkawn Police Station chuan Central Equipment Identity Register kaltlanga mobile phone bo an chhui hnua an hmuhlet 31 chu vawiin khan a neitute hnenah an hlan.

Bawngkawn OC Room-a mobile phone a neitute hnena an pek let hi a vaiin 31 a ni a, thla liam ta July ni 28 leh tun thla ni 17 inkara mobile phone bo an hmuh let te an ni.

Bawngkawn Police Station Officer in charge Pu Vanlalpeka DSP (Probation) chuan phone bo awm chu CEIR kaltlangin an chhui thin tih sawiin application ah phone number an chhut lut chuan phone bo ah sim card vuah tu zawng zawng leh vuah thin te a lang thei an ti a, CEIR kaltlangin phone ah chuan tu sim card nge an hman mek tih thlengin a lang thei tih sawiin hnuchhui kawngah an awlsam phah a ti a, kuminah Mobile phone bo 200 chuang CEIR kaltlangin hmuh let ani tawh tih a sawi bawk.



MZP SIT-IN PROTEST

Vawiin khan North East Students Organisation huaihawtin, MZP General Headquarters chuan, Vanapa Hall kawt-ah hmarchhak biala ramdang mi an duhlohna tarlangin an pungkawm.

MZP huaihawt "Sit-in Protest against illegal immigration in North East States" hi hmarchhak state dang ruala neih niin MZP President Pu H. Lalthianghlina chuan hmarchhak state ah ramdang mi Bangladesh atanga lokal an tam avangin buaina hrang hrang a awm phah a ti a, Assam chu buai ber anni tih sawiin Mizoram pawh harh thar an tul hle tih sawiin Sawrkar chuan ruahmanna khauh tak siamin ramri venghim se an duh tih a sawi.

NESO Vice Chairman Pu Ricky Lalbiakmawia pawhin thu sawiin kum tam tak kal ta atangin Hmarchhak bial ten dan lova lo pem lutte thununna leh um zuina tha tak a neih loh avangin harsatna a lo tawh nasa tawh a ni a ti a, ram leilung fa ngei te hamthatna tur hrang hrang an chuh ve zel tih sawiin theihtawpa sawrkar a tan a ngai a ti a, Bangladesh atanga raltlan an tam avanga Assam sawrkar in a hnawhchhuah runpui a kalpui mek chu an thlawp tlat tih sawiin Mizoram ah pawh ramri venhim kawngah nasa zawka tan lak a tul thu a sawi bawk.

NESO Coordinator H. Hrangkunga chuan vawiina an punkhawm chhan chu hmarchhak bialah dan loa ramdang mi pem lut te dang tura sawrkar nasa taka an nawrna in awmzia a neihloh avanga pungkawm an nih thu sawiin Dan lova ram chhunga rawn pem lutte chu hmun dangah sawn kual mai mai an nih lohna turin

thenawm State-te leh a kaihnawih Agency-te nena thawhhona tha neih an duh thu a sawi bawk.



LADC NEW CEM

Lai Autonomous District Council, Chief Executive Member atan M.Kawnpui bialtu Pu N.Zangura chu vawiin khan Additional DC Lawngtlai Pu David Lalrinawma'n rinawmna thu tiamtirin a la lut.

Byte : Oath taking Pu N. Zangura

CEM lakluhna inkhawm, LADC a Exeutive Secretary Pu K.Lalthanzara kaihhruaiah hian CEM thar Pu N.Zangura chuan LADC Term 11-na ah hun harsa tak tak an tawh tih sawiin, hun pawimawh ah ram hruai hna thawk tura a chungamawhphurhna tla chu lawmawm a tih rualin amah chauh chuan hma chhawn ngaihna a awmlo a ti a, LADC member, hnathawktute, Kohhran leh khawtlang hruaitute leh ram mipuite thawhpuih sawmin, LADC tan ngaihtuahna sengthar tur leh engkimah finchhuah thin turin a sawm a ni.

United Democratic Alliance hruaitu Pu N.Zangura hian a chan pual bak engmah a beisei loh tur thu sawiin, pawisa chu dik taka hman a nih chuan ram mipuiten engemaw zawng talin an tangkaipui ngei a beisei thu a sawi a, LADC hnuaia thawkte leh a Sorkara a thawhpuite pawh sum thianghlimlo laka inthiarfihlim ngam turin a a chah a ni.

Pu N. Zangura hian a thawhpui tur Executive member pakua chu vawiin khan a ruat nghal a, LADC ah hian MDC 25 awmin tun dinhmunah UDA ah hian MNF MDC 11 leh BJP MDC pahnih an awm bakah pawn lam atangin Congress MDC neih chhunin a tlawp a, an vaiin member 14 an nei a, ZPM in MDC 11 an nei thung a ni.



LAUNCHING OF UPSC GROOMING SCHEME

School Education Minister Dr. Vanlalhlana'n vawiin khan Mizoram Board of School Education (MBSE) Conference Hall-ah UPSC Grooming Scheme a hawng.

School Education Minister Dr. Vanlalhlana chuan UPSC Grooming Scheme chu Minister dawhkan atanga rawt chhuak chawp mai nilo in ZPM party in manifesto a neih atanga lo chhuak a nih thu a sawi a. Mizo thalaite chu UPSC exam ah bik takin All India Service (AIS) exam ah hlawhtlinna chang an awm hleitheitawhloh avangin UPSC Grooming Scheme chu buatsaih a ni a ti a. He Scheme kaltlang hian All India Service level hrang hrangah mizo thalai te an luh theih nana inrem chhoh beiseiin he hmalakna hi kalpui tum a nih thu a sawi.

Byte : Dr Vanlalhlana

UPSC Grooming Sceme hi Mizoram Board of School Education (MBSE) ten kalphung mumal tak duan in Mizoram Youth Commission(MYC) hnuaiah kalpui a ni dawn a ni.



VICE PRESIDENT NDA CANDIDATE

Vice President thlanna lo awm tur ah Maharashtra Governor CP Radhakrishnan chu NDA candidate a ni dawn.

Thla leh september ni 9-a Vice President thlanna neih turah hian BJP National President leh Union Minister JP Nadda chuan NDA Candidate CP Radhakrishnan chu an candidate a nih tur thu hi New Delhi ah puangin NDA-a an thawhpui zawng zawng ten an thlawp thu a sawi bawk.

Prime Minister Narendra Modi pawhin NDA thuthluk na chu lawmawm a tih thu a sawi a, Pu Radhakrishnan chu ram tan a inpe leh mi inngaitlawm tak anih thu sawiin, hna hrang hrang chelh chhungin khawtlang tan nasa tak a thawk leh mi hnuaihnung zawk te chhawmdawl kawng ah a thawh nasat thu a sawi bawk.

